



Broj: 4-6/2015
Datum: 10.01.2015.

Na osnovu člana 42. stav 2 i 7 i člana 53 stav 1 pod c) Zakona o visokom obrazovanju u Brčko distriktu, a uz prethodno mišljenje Upravnog odbora broj 3-6/2015 od dana 8.01.2015 godine, Senat na sjednici održanoj 10.01.2015. godine donosi

ODLUKU

o izmjenama i dopunama Statuta Evropskog univerziteta

Član 1.

U Statutu Evropskog univerziteta Brčko distrikt član 52 stav 2 mijenja se i glasi:
„(2) Student stiče pravo da prijavi temu završnog rada kada upiše osmi semestar.“

Član 2.

Član 59 stav 5 i 6 mijenjaju se i glase:

„(5) Prijedlog za imenovanje mentora i/ili komentora daje kandidat nakon konsultacija sa predmetnim nastavnikom.

(6) Ukoliko kandidat nije zadovoljan izborom mentora/komentora ili ukoliko nema mogućnosti da se između kandidata i mentora ostvari uspješna saradnja, kandidat ima pravo da se obrati Naučnonastavnom vijeću sa zahtjevom da se promijeni mentor.“

Član 3.

Član 61 mijenja se i glasi:

„(1) Prijavu prijedloga teme magistarskog, odnosno doktorskog rada razmatra Naučnonastavno vijeće.

(2) Povodom prijave prijedloga teme magistarskog rada Naučnonastavno vijeće formira komisiju za ocjenu podobnosti teme i kandidata i imenuje mentora.

(3) Komisija iz stava (2) ovog člana je u obavezi da Naučnonastavnom vijeću podnese izvještaj o ocjeni podobnosti teme i kandidata u roku od 15 dana.

(4) Po usvajanju pozitivnog izvještaja iz stava (3) ovog člana od strane Naučnonastavnog vijeća, kandidat pristupa istraživanju teme i izradi rada.

(5) Povodom prijave prijedloga teme doktorske disertacije Naučnonastavno vijeće Senatu predlaže imenovanje komisije za ocjenu podobnosti kandidata i teme i imenovanje mentora.

(6) Na osnovu prijedloga iz stava (5) ovog člana, Senat donosi odluku o imenovanju komisije za ocjenu podobnosti teme i kandidata i imenuje mentora.

(7) Komisija iz stava (6) ovog člana je u obavezi da Naučnonastavnom vijeću podnese izvještaj o ocjeni podobnosti teme i kandidata u roku od 15 dana, koji Vijeće po razmatranju dostavlja Senatu na usvajanje.

(8) Po usvajanju pozitivnog izvještaja iz stava (7) ovog člana od strane Senata, kandidat pristupa istraživanju teme i izradi doktorske disertacije.“

Član 4.

Član 62 mijenja se i glasi:

„(1) Kandidat predaje izrađeni magistarski, odnosno doktorski rad mentoru.

(2) Mentor obavještava Naučnonastavno vijeće da je kandidat okončao rad na izradi magistarskog, odnosno doktorskog rada.

(3) Po dobijanju obavještenja mentora iz stava (2) ovog člana Naučnonastavno vijeće formira komisiju za ocjenu i javnu odbranu magistarske teze od tri člana, odnosno predlaže Senatu imenovanje komisije za ocjenu i javnu odbranu doktorske disertacije.

(4) Na osnovu prijedloga iz stava (3) ovog člana, Senat donosi odluku o imenovanju komisije za ocjenu i javnu odbranu doktorske disertacije, koja broji tri ili pet članova, od kojih najmanje jedan član nije u radnom odnosu na Univerzitetu.

(5) Komisija iz stava (3) i (4) ovog člana je dužna da Naučnonastavnom vijeću podnese izvještaj o ocjeni rada u roku od 30 dana od dana preuzimanja magistarske teze, odnosno doktorske disertacije.

(6) Naučnonastavno vijeće usvaja izvještaj komisije o ocjeni magistarske teze, odnosno predlaže Senatu da usvoji izvještaj komisije o ocjeni doktorske disertacije.“

Član 5.

Član 63 mijenja se i glasi:

„(1) Nakon usvajanja izvještaja o ocjeni rada, magistarska teza, odnosno doktorska disertacija, zajedno sa izvještajem komisije, stavlja se na uvid javnosti u trajanju od najmanje 15 dana uz objavljivanje na sajtu Univerziteta da se može pročitati u biblioteci.

(2) Datum i vrijeme javne odbrane određuje se rješenjem dekana za magistarsku tezu, odnosno rješenjem rektora za doktorsku disertaciju.“

Član 6.

Član 64 mijenja se i glasi:

„(1) Na javnoj odbrani magistarske teze, odnosno doktorske disertacije kandidat obrazlaže rezultate istraživanja i brani zaključke do kojih je došao.

(2) Predsjednik komisije otvara zasjedanje i saopštava biografske podatke o kandidatu, podatke o njegovom ranijem naučnom radu, kao i podatke o ispunjenosti uslova za odbranu teze, odnosno disertacije.

(3) Kandidat izlaže usmeno predmet i metod svog istraživanja, saopštava glavne naučne rezultate svog rada i daje odgovore i komentare na postavljena pitanja i osvrt članova komisije i prisutnih lica.

(4) Nakon završne riječi kandidata, komisija se povlači na vijećanje i donošenje odluke o rezultatu odbrane.

(5) Na vijećanju komisija, bez prisustva drugih lica, donosi odluku da li je kandidat odbranio tezu, odnosno disertaciju, a zatim javno saopštava odluku.

(6) Odluka komisije može da glasi „nije odbranio“, „odbranio većinom glasova“, „odbranio jednoglasno“, ili „odbranio sa odlikom“.

(7) U toku odbrane teze, odnosno disertacije vodi se zapisnik koji potpisuju članovi komisije.“

Član 7.

U članu 109 stav 3 alineja 5 riječi: „Fakultet zdravstvenih nauka“ zamjenjuju se riječima „Fakultet za medicinu, farmaciju i zdravstvo“.

Član 8.

Član 110 mijenja se i glasi:

„(1) Naučnonastavno vijeće je akademski organ fakulteta i čine ga dekan, prodekani, nastavnici i saradnici u zvanju asistenta koji su u stalnom radnom odnosu na Univerzitetu, koji učestvuju u naučnonastavnom procesu fakulteta, kao i jedan student izabran od Skupštine studentske organizacije fakulteta.

(2) Naučnonastavno vijeće:

- 1) predlaže nastavni plan i program fakulteta kao dio integralnog nastavnog plana i programa Univerziteta;
- 2) donosi odluke o akademskim, naučnim i stručnim pitanjima na nivou fakulteta;
- 3) formira komisije u postupku sticanja naučnog stepena magistra i imenuje mentore i utvrđuje prijedlog komisije u postupku sticanja naučnog stepena doktora nauka i predlaže mentora;
- 4) predlaže rektoru imenovanje i razrješenje dekana;
- 5) imenuje i razrješava prodekana, na prijedlog dekana, a uz prethodnu saglasnost osnivača;
- 6) odlučuje o prigovorima studenata na odluku dekana o pojedinačnim pravima, obavezama i odgovornostima;
- 7) obavlja i druge poslove u skladu sa zakonom, ovim Statutom i drugim opštim aktom Univerziteta.

(3) Sjednice nastavnonaučnog vijeća fakulteta održavaju se po potrebi i mogu se održati ako sjednici prisustvuje većina članova, a odluke se donose većinom glasova prisutnih članova.

(4) Sjednicama nastavnonaučnog vijeća mogu prisustvovati i nastavnici – vanjski saradnici, koji nisu u stalnom radnom odnosu na Univerzitetu. Oni mogu da učestvuju u radu vijeća, daju prijedloge, sugestije i mišljenja, ali bez prava glasa.

(5) Dekan rukovodi fakultetom, planira i razrađuje rasporede akademskog osoblja angažovanog na studijskim programima na fakultetu, izdaje radne naloge angažovanom akademskom osoblju i stara se o odvijanju nastavno-naučnog procesa na fakultetu, predstavlja fakultet i donosi pojedinačne akte u skladu sa zakonom i ovim Statutom.

(6) Za dekana može da bude imenovano lice u zvanju redovnog profesora, vanrednog profesora, a izuzetno i docenta.

(7) Dekana imenuje i razrješava rektor na prijedlog naučnonastavnog vijeća uz prethodnu saglasnost osnivača na period od 4 godine.

(8) Dekanu u radu pomažu prodekani.

(9) Dekan i prodekani su nadležni i odgovorni za obavljanje sljedećih poslova:

- organizaciju nastave, predavanja, vježbi, bodovanja, testiranja i ocjenjivanja;
- kontrolu održavanja nastave i ocjenjivanja;
- kontrolu kvaliteta realizacije nastavnog plana i programa;
- planiranje, iznalaženje i učestvovanje u izboru nastavnika i saradnika;
- predlaganje raspisivanja konkursa za izbor i unapređenje nastavnika i saradnika;
- predlaganje usavršavanja nastavnika i saradnika;
- pokretanje i vođenje disciplinskih postupaka protiv nastavnika, saradnika i studenata;
- predlaganje i učestvovanje u okruglim stolovima, stručnim konferencijama i slično;
- donošenje rješenja o odbrani diplomskog rada;
- donošenje odluka o ispisu studenata, promjeni smjera, promjeni statusa studenata i odluka o mirovanju prava i obaveza studenata, kao i odluka o odobravanju teme diplomskog rada i imenovanju mentora.

(10) Dekan i prodekan mogu da budu razriješeni dužnosti i prije isteka roka na koji su imenovani iz razloga zbog kojih može biti razriješen rektor prije isteka perioda na koji je biran.

(11) Na prijedlog osnivača, dekan i prodekan mogu da budu razriješeni dužnosti i prije isteka roka na koji su imenovani.

(12) Dekan je po funkciji član Senata Univerziteta.

(13) Dekan predsjedava i rukovodi radom nastavnonaučnog vijeća fakulteta.

(14) Univerzitet može na osnovu odluke Senata osnovati vijeće katedre na fakultetu.

Članove vijeća katedre čine svi nastavnici i saradnici koji imaju izbor za predmete ili užu naučnu oblast koju pokriva određena katedra, bilo da su u stalnom radnom odnosu ili vanjski saradnici.“

Član 9.

Član 115 mijenja se i glasi: „Fakultet za medicinu, farmaciju i zdravstvo je matičan za Opštu medicinu, Stomatologiju, Farmaciju, Sestrinstvo, Radiologiju, Sanitarni inženjering, Fizioterapiju i radnu terapiju, Menadžment u zdravstvu, Menadžment u sportu i Sportskog trenera“.

Član 10.

U članu 125 dodaje se stav 2 koji glasi:

„ (2) Kao savjetodavno tijelo organa iz stava 1 ovog člana obrazuje se Savjet Univerziteta.“

Član 11.

U članu 128 stav 1 mijenja se i glasi:

„(1) Radom Upravnog odbora rukovodi predsjednik Upravnog odbora. Predsjednik Upravnog odbora je osnivač, ili lice koje odredi osnivač.“

Član 12.

U članu 133 stav 1 i 2 se mijenjaju i glase:

„(1) Senat Univerziteta čine rektor i prorektori Univerziteta, dekani, predstavnici nastavnog osoblja sa svakog fakulteta Univerziteta, direktori instituta, kao i dva predstavnika studenata – po jedan iz prvog i drugog ciklusa studija, koje bira Studentski parlament Univerziteta.

(2) Asistenti u stalnom radnom odnosu biraju jednog člana Senata.“

Stav (3) se briše.

Stavovi (4) i (5) postaju stavovi (3) i (4).

Član 13.

Član 134 mijenja se i glasi:

„(1) Senat Univerziteta nadležan je da:

- 1) odlučuje o svim akademskim pitanjima;
- 2) odlučuje o pitanjima nastavne, naučne i stručne djelatnosti Univerziteta;
- 3) donosi Statut Univerziteta na osnovu prethodnog mišljenja Upravnog odbora;
- 4) donosi Etički kodeks, kojim se utvrđuju etička načela u visokom obrazovanju, objavljivanju naučnih rezultata, odnosu prema intelektualnoj svojini, odnosima između nastavnika i saradnika i drugih zaposlenih i studenata;
- 5) donosi opšte akte u skladu sa zakonom i ovim Statutom;
- 6) donosi nastavne planove i nastavne programe dodiplomskih, postdiplomskih i doktorskih studija;
- 7) utvrđuje upisnu politiku;
- 8) donosi nastavni plan i program stalnog stručnog obrazovanja i usavršavanja;
- 9) donosi program naučnih istraživanja Univerziteta;
- 10) odlučuje o sadržaju i načinu realizacije programa stručnog obrazovanja nastavnika i saradnika;
- 11) donosi odluku o utvrđivanju užih naučnih oblasti;
- 12) bira i razrješava rektora i prorektore Univerziteta uz prethodnu saglasnost osnivača;
- 13) bira akademsko osoblje na prijedlog naučnonastavnih vijeća fakulteta;
- 14) imenuje komisije i mentora u postupku sticanja doktorata nauka;
- 15) dodjeljuje počasna zvanja "profesor emeritus" i "počasni doktor nauka" (*honoris causa*);
- 16) podnosi prijedlog Upravnom odboru za organizovanja, statusnu promjenu i ukidanje fakulteta i drugih organizacionih jedinica Univerziteta;
- 17) odobrava razvojne i organizacione planove;
- 18) donosi odluku u skladu sa zakonom i ovim Statutom o ništavosti javne isprave koju je izdao Univerzitet;

19) imenuje stalne ili privremene organe, radne grupe, komitete, grupe za praćenje kvaliteta rada i slično;

20) propisuje odredbe kojima se reguliše rad organa koje imenuje Senat;

21) vrši nostrifikaciju diploma i ekvivalenciju školskih javnih isprava, i

22) obavlja druge poslove u skladu sa zakonom, osnivačkim aktom i ovim Statutom.

(2) Senat Univerziteta odlučuje o akademskim pitanjima na prijedlog stručnih organa organizacionih jedinica kao i drugih organa Univerziteta i Studentskog parlamenta.

Član 14.

U članu 137 poslije stava (1) dodaje se stav (2) koji glasi:

„(2) Sjednicom Senata na kojoj se bira rektor predsjedava najstariji prisutni član Senata sa zvanjem redovnog profesora.“

Dosadašnji stav (2) postaje stav (3).

Član 15.

U članu 140 stav (2) mijenja se i glasi:

„(2) Ukoliko se utvrdi jedan od slučajeva iz stava (1) ovog člana, rektor može biti razriješen dužnosti prije isteka perioda na koji je biran na inicijativu većine članova Senata uz prethodnu saglasnost osnivača.“

Poslije stava (2) dodaju se novi stavovi (3) do (5) koji glase:

„(3) Na prijedlog osnivača, rektor može biti razriješen dužnosti prije isteka perioda na koji je biran.

(4) Sjednicu Senata na kojoj se glasa o razrješenju dužnosti rektora prije isteka perioda na koji je biran saziva i njome predsjedava najstariji član Senata.

(5) Odluka o razrješenju rektora sa dužnosti prije isteka perioda na koji je biran donosi se većinom glasova prisutnih članova Senata.“

Član 16.

Član 146 mijenja se i glasi:

„(1) Prorektore bira Senat na period od četiri godine, bez konkursa, iz reda profesora koji su u radnom odnosu na Univerzitetu sa punim radnim vremenom, uz prethodnu saglasnost osnivača.

(2) Prorektor može da bude razriješen dužnosti i prije isteka roka na koji je biran iz razloga zbog kojih može biti razriješen rektor prije isteka perioda na koji je biran.

(3) Na prijedlog osnivača, prorektor može da bude razriješen dužnosti i prije isteka roka na koji je biran.

(4) Odluka o razrješenju prorektora sa dužnosti prije isteka perioda na koji je biran donosi se većinom glasova prisutnih članova Senata.“

Član 17.

Član 147 mijenja se i glasi:

„(1) Savjet Univerziteta čine osnivač i dva člana.

(2) Članove Savjeta Univerziteta određuje osnivač.

(3) Predsjednik Savjeta Univerziteta je osnivač.

(4) Savjet Univerziteta:

- nadzire rad organa iz člana 125 stava 1 ovog Statuta;

- po svojoj inicijativi ili na traženje organa iz člana 125 stav 1 ovog Statuta daje mišljenje na akte koje donose ti organi;

- upozorava organe iz člana 125 stava 1 ovog Statuta na nepravilnosti u njihovom radu, i

- obustavlja od izvršenja akte organa iz člana 125 stava 1 ovog Statuta u slučaju njihove nezakonitosti.“

Član 18.

Članovi 148 i 149 se brišu.

Član 19.

Naslov iznad člana 150. i član 150. mijenjaju se i glase:
„15. Studentski predstavnički organi

Član 150.

(1) Studentski parlament Univerziteta je najviše predstavničko tijelo studenata Univerziteta, koji se sastoji od po pet izabranih predstavnika studenata svih fakulteta Univerziteta.

(2) Studentskim parlamentom Univerziteta rukovodi predsjednik Studentskog parlamenta, koga bira Parlament.

(3) Studentski parlament bira dva predstavnika studenata u Senat Univerziteta vodeći računa da predstavljaju prvi i drugi obrazovni ciklus studiranja koji su organizovani na Univerzitetu.

(4) Skupština studentske organizacije fakulteta je najviše predstavničko tijelo studenata fakulteta, koju čine svi studenti upisani na fakultet.

(5) Skupštinom studentske organizacije fakulteta rukovodi predsjednik Skupštine, koga bira Skupština.

(6) Skupština studentske organizacije fakulteta bira jednog člana u Nastavnonaučno vijeće fakulteta.

(7) Mandat članova studentskih predstavničkih organa na Univerzitetu i fakultetima traje godinu dana.

(8) Način rada Studentskog parlamenta i Skupštine studentske organizacije fakulteta uređuju se poslovnica o radu.“

Član 20.

Član 151. do 154. se brišu.

Član 21.

U članu 171. stav 1 tačka b) alineja 10 mijenja se i glasi:

„Poslovnica o radu Senata i nastavnonaučnog vijeća fakulteta;“

Član 22.

Ova odluka stupa na snagu danom dobijanja rješenja Odjeljenja za obrazovanje Vlade Brčko distrikta o njenoj usklađenosti sa zakonom.

Dostaviti:

- 1) Odjeljenju za obrazovanje Vlade Brčko distrikta, i
- 2) Arhivi Univerziteta.

REKTOR
Prof. dr Mirko Kulić